



CH-7144 Vella, 12/08/2016

Novitads dalla suprastanza communal

Contracts denter la vischnaunca Lumnezia e las Pendicularas Mundaun SA

Il contracts denter la vischnaunca Lumnezia e las Pendicularas Mundaun SA en connex cun il project d'ennevar e dretgs da servitud enteifer il territori da skis dalla Lumnezia ein vegni serrai giu ed impurtai el register funsil.

Brat da terren a Vattiz

La suprastanza communal ha approbau in brat da terren denter la vischnaunca Lumnezia e Reto Casanova, Vattiz, enteifer las parcellas nr. 8096 ed 8407 Plattas a Vattiz. Cunquei che la parcella 8407 da Reto Casanova ha silsunter buca pli in access direct naven dalla via communal eis ei plinavon stau necessari da conceder in dretg da passadi a pei e cun vehichels sur la parcella nr. 8096.

Furniziun d'energia dad ovras communalas ella reit publica

Il contracts cun la Repower AG per furnir la produziun d'energia dils indrezs dalla vischnaunca Lumnezia ein vegni prolunghi per ils proxims 9 onns. Ei setracta dils treis indrezs da produziun a Camuns, Uors e Vignogn.

Implont solar sil tetg dalla casa da scola Vella

La construcziun d'in implont solar fotovoltaic sin il tetg dalla casa da scola a Vella ei vegnida annunciada alla ICF (KEV). La ICF promova la produziun d'energia ord resursas regenerablas. Actualmein ei il project sin il 20'000avel plaz da spetga tier la ICF. Da present vegn la calculaziun dalla rentabilitad elavurada.

Regiun da planisaziun Surselva per las casas da tgira

La suprastanza communal sustegn la proposta digl uffeci da sanadad dil Grischun da formar ina suletta regiun da planisaziun per las casas da tgira en Surselva, che cumpeglia las regiuns da planisaziun hodiernas da Cadi Sursassiala, Cadi Sutsassiala e Glion. La vischnaunca da Flem vegn transferida dalla regiun da planisaziun Glion alla regiun da planisaziun Plaun.

Parc Adula

La suprastanza communal ha elegiu il commember dalla suprastanza communal, Ronnie Caminada, sco delegau per l'uniun Parc Adula. El vegn ad exequir l'incumbensa duront la perioda d'uffeci currenta, numnadamein entochen ils 31 da december 2016. La votaziun davart il Parc Adula ha liug ils 27 da november 2016.

Marcau Daniev 2016

Il marcau Daniev 2016 ha liug ils 28 da december 2016 a Vella. Sco ils davos onns procura il survetsch tecnic per l'infrastructura necessaria. Per l'organisaziun e la tempra dil marcau duein las uniuns dil vitg esser responsablas.

Damondas per contribuziuns finanzialas

La suprastanza communal ha decidiu da sustener ils suandonts projects cun ina contribuziun finanziala:

- Open Air Lumnezia 2016
- Instituziun Ovra Svizra da Lectura per la Giuventetgna
- Ediziun dil cudisch biling da Cornelia Vinzens "Portrets d'ina generaziun en Surselva"